

আমার পরিকল্পনায় ইসলামী বিশ্ববিদ্যালয়

[নিবন্ধটি ১৯৭০ সনের জুন মাসে তদানিন্তন দৈনিক পাকিস্তানে প্রকাশিত হয়।
১৯৭০ সনের ৮ সেপ্টেম্বর সন্তোষ ইসলামী বিশ্ববিদ্যালয় দরবার হলে অনুষ্ঠিত
সুধী সম্মেলনে মওলানা ভাসানী নিবন্ধটি আনুষ্ঠানিক ভাবে উপস্থাপন করেন।]

ইসলামী বিশ্ববিদ্যালয় ইসলামী পরিকল্পনায়ই হওয়ার কথা। আমার পরিকল্পনা বলিতে আলাদা কিছু হইতে পারেনা। তবে ইসলামী পরিকল্পনা বলিলে আজকাল স্পষ্ট কোন ধারণা নেওয়া সম্ভব নয়। তাই টাঙ্গাইল হইতে দুই মাইল পশ্চিমে আমি যে ইসলামী বিশ্ববিদ্যালয় প্রতিষ্ঠা করিতে চাহিতেছি তাহার কাঠামো ও বিষয়গত কিছু পরিচয় দান করা প্রয়োজন মনে করি এবং ইহাতে আরও আশা রাখি যে দেশের শিক্ষাবিদগণ পত্র-পত্রিকায় ইসলামী বিশ্ববিদ্যালয়ের পরিকল্পনা সম্পর্কে বিশদ আলোচনা করিবেন। তাহাতে আমি নিশ্চয়ই উপকৃত হইব।

কেন পরিকল্পনা

আমি খোলাখুলি ভাষায় বলিয়া ফেলিতে চাই, স্থান ও কালের উর্ধে ইসলামের যে আবেদন রহিয়াছে তাহা কখনও বাস্তবায়িত হয় নাই। রাসূলুল্লাহর (দঃ) ওফাতের পর সরকারী বেসরকারী উভয় দিক হইতেই চেষ্টা শুরু হইয়াছিল। কিন্তু মানুষের আদিম দুষ্ট মন ইহাকে বানচাল করিবার কাজে লাগিয়া গিয়াছিল। ইহার পর সরকারী ভাবে ইসলামের সেইসব আবেদনকে লালন-পালন করা হয় নাই। তবে যুগে যুগে এমন মুসলিম পণ্ডিতবর্গও জন্ম নিয়াছেন যাহারা একক প্রচেষ্টায়ই সেই আবেদন তুলিয়া ধরিতে সক্ষম হইয়াছেন। কিন্তু কৌথাও কোন প্রচেষ্টা একটানা শতাব্দীকালও টিকিয়া থাকিতে পারে নাই।

যাহা হউক তাহাদের সংগ্রাম মাঝে মাঝে স্তিমিত হইয়া গেলেও তাহা একেবারে কখনও বিলুপ্ত হয় নাই কিংবা বিলোপ সাধন সম্ভব হয় নাই। আমরাও আজ সেই সংগ্রামের ধারাকে স্বরণ করিয়া ইসলামের মৌলিক আবেদনকে অবলম্বন পূর্বক স্থান কাল ও পাত্র বিশেষে একটি সমাজ প্রতিষ্ঠার উদ্যোগ গ্রহণ করিতে পারি। সেই সমাজ প্রতিষ্ঠিত হইবেই, সে ভরসা আমাদের আছে। কিন্তু ভরসা লইয়া বহুকর্মী অনেক কাল শুধু বসিয়াই রহিলেন। কাজের কাজ কিছু করিয়া যাইতে পারেন নাই বলিয়া আজও ইসলামী বিশ্ববিদ্যালয়ের পরিকল্পনা সুধী সমাজে উপস্থাপিত করিতে হয়, ইহাই আফসোস।

ইসলামের বৈপ্লবিক দৃষ্টিভঙ্গীকে যিনি উপলব্ধি করিতে পারিয়াছেন, তিনি নিরক্ষর কিংবা অশিক্ষিত হইলেও, যুগের দাবীকে উপলক্ষ করিয়া লক্ষ্যে পৌঁছবার সব রকম পন্থা চিনিয়া লইতে পারেন। কিন্তু আপন সমাজকে বিশ্বের দরবারে তুলিয়া ধরিতে, দুনিয়ার অগ্রগতির সঙ্গে তাল মিলাইয়া চলিতে এবং সর্বোপরি ইতিহাসের যে কোন চ্যালেঞ্জকে মোকাবিলা করিয়া মানবজাতির জন্য শাস্তত কল্যাণ স্বরূপ স্বীয় ধারাকে প্রবহমান করিয়া রাখিতে ভাবগত ও বিষয়গত সর্বোত্তম শিক্ষা অর্জনের সুযোগ থাকা দরকার। তাই ইসলামী বিশ্ববিদ্যালয়ের পরিকল্পনা।

দুইটি কাজ

ইসলামী বিশ্ববিদ্যালয়ের দুইটি কাজ হইবে। একটি পড়াশুনা আর একটি শিক্ষা-দীক্ষা। প্রশ্ন উঠিতে পারে দুইয়ের পার্থক্য কোথায়। ভাষাগত পার্থক্য কতদূর আছে না আছে তাহা লইয়া মাথা ঘামাইতেছি। তবে বৈশিষ্ট্যের দিক দিয়া আলবৎ পার্থক্য রহিয়াছে। পড়াশুনার ক্ষেত্রে ছাত্র-ছাত্রীরা দুনিয়ার কোন বিশ্ববিদ্যালয় হইতেই পিছে পড়িয়া থাকিবে না। ভাষা, সাহিত্য, বিজ্ঞান, ইতিহাস, ভূগোল, বাণিজ্য, দর্শন, অর্থনীতি, রাষ্ট্রনীতি, সমাজতত্ত্ব ইত্যাদি যাবতীয় বিষয় পড়াশুনার সুযোগ থাকিবে। তবে বিশেষ করিয়া ইতিহাস, দর্শন, অর্থনীতি, রাষ্ট্রনীতি ও সমাজতত্ত্বের পাঠ্য বিষয় বাছাইয়ের ব্যাপারে এমন একটি মাপকাঠি ও দৃষ্টিভঙ্গী থাকিবে যাহাতে ছাত্র-ছাত্রীরা মানবতার কল্যাণকে সবকিছুর উর্ধে স্থান দেওয়ার মানসিকতা অর্জন করিতে পারে। আমি

বিশ্বাস করি, এইসবে এমন উপাদান রহিয়াছে যাহা প্রত্যেকটি ছাত্র-ছাত্রীকে বিপ্লবী তৎসঙ্গে সহনশীল, ন্যায়পরায়ণ, সত্যবাদী, দেশপ্রেমিক ও আন্তর্জাতিকতাবাদী করিয়া তুলিতে পারে। কিন্তু সুপরিকল্পিত ভাবেই সেই সব উপাদানকে মুসলিম জাহানের সর্বত্র বিস্তৃতির অতলগর্ভে বিলীন করিয়া দিবার চেষ্টা চলিতেছে। কিন্তু ইহা যে মোটেই সম্ভব নয়, তাহা প্রমাণ করিয়া দিতে হইবে।

আমি আর একটি বিষয় পড়াশুনার ক্ষেত্রে খোলাখুলি বলিয়া ফেলিতে চাই।

ইসলামী বিশ্ববিদ্যালয়ের মুসলিম ছাত্র-ছাত্রীরা বাধ্যতামূলক ভাবে কুরআন ও হাদিসের সত্যিকারের ব্যাখ্যা, যা সর্বযুগে বৈপ্লবিক চেতনার উন্মেষ সাধন করিবে, তাহাই রপ্ত করিবে। আজকাল মাদ্রাসা শিক্ষা বলিতে যাহা বুঝায় ইসলামী শিক্ষা তাহা নহে। তাই কুরআন হাদিসের মৌলিক বিষয় এবং ইসলামী জনতার ইতিহাস ইসলামী বিশ্ববিদ্যালয়ের ছাত্র-ছাত্রীদিগকে সক্ষীর্ণমনা করিবেনা, কৃপমন্ডুক হইতে দিবেনা। তাহারা হইবে আবুজর গিফারীর মত প্রতিবাদকারী, হযরত আলীর ন্যায় জ্ঞানপিপাসু, গাজী সালাহ উদ্দীনের মতই মোজাহেদ এবং ইমাম আবু হানিফার ন্যায় শহীদ। তাহারা আব্রাহাম লিঙ্কনকে শ্রদ্ধা করিবে, মাও সে-তুঙকে ক্ষেত্র বিশেষে অনুকরণও করিবে। সকল উদারতা লইয়া তাহারা মানুষকে এবং মানুষের কল্যাণমুখী শিক্ষাকে বড় করিয়া দেখিবে। তবে ইহাও ঠিক, তাহারা মৌলিক শিক্ষার ব্যাপারে একমুখীন হইয়াই কাজ করিবে। বাহ্যতঃ শিক্ষাটা পরস্পর বিরোধী মনে হইলেও বাস্তবে ইহা নিঃসন্দেহে প্রমাণ করা যাইবে, ইসলামী বিশ্ববিদ্যালয়ের উপাদানে গড়া প্রতিটি ছাত্র-ছাত্রী চিন্তা ও কর্মে হইবে আত্মনির্ভরশীল অথচ আত্মকেন্দ্রিক নয়; আত্মসচেতন কিন্তু অহঙ্কারী নয়।

শিক্ষা-দীক্ষার ক্ষেত্রে স্থান ও কাল সবিশেষ গুরুত্ব লাভ করিবে। ছাত্র-ছাত্রীরা চরিত্র গঠন ও ব্যক্তিত্ব স্ফুরণের শিক্ষা লাভ করিবে। তাহারা বিনয়ী হইলেও স্ব-স্ব কর্তব্যে উদ্দাম চাঞ্চল্য সহকারে ঝাঁপাইয়া পড়িবে। ছাত্র-ছাত্রীরা গাষ্টীর্যের শিক্ষা লাভ করিলেও রসবোধে জীবনটাকে প্রাণময় করিয়া রাখিবে। আদব কায়দায় তাহারা যেমন অনুসরণীয় হইয়া উঠিবে,

ঠিক তেমন স্মার্টনেসের দিক হইতেও তাহারা হইবে অনুকরণীয়। এইসব দীক্ষা লাভের সঙ্গে সঙ্গে আজকের দুনিয়ার সহিত শুধু তাল মিলাইয়া নয়, অগ্রগামী হইবার জন্য বিশেষ যত্ন সহকারে কারিগরি শিক্ষালাভ করিবে। তাঁতের কাজ, যান্ত্রিক পদ্ধতিতে কৃষিকাজ, মাছের চাষ, রেশমের চাষ, গাছ-গাছড়া, ফল ও সজীর চাষ, পশু পালন, রাজ-মন্ত্রী ও সূতার মন্ত্রীর কাজ, চামড়ার কাজ ইত্যাদি যাবতীয় টেকনিক্যাল শিক্ষা ছাত্র-ছাত্রীরা লাভ করিবে এবং ইহাদের কমপক্ষে একটি প্রত্যেক ছাত্র-ছাত্রীর জন্য বাধ্যতামূলক থাকিবে। আর ইহাই হইবে পার্থিব ক্ষেত্রে তাহাদের সংসাহস ও মনোবল রক্ষার চাবিকাঠি। কারণ দেশব্যাপী বেকার সমস্যা বিরাজ করিলেও তাহারা বেকার থাকিবে না, না খাইয়া মরিবে না।

কেমন পরিকল্পনা

গোটা বিশ্ববিদ্যালয়টি আবাসিক করিবার পরিকল্পনা আমার রহিয়াছে। প্রত্যেকটি ছাত্র-ছাত্রী দিনরাত এখানেই থাকিবে। খেলা-ধুলা ও আমোদের ব্যবস্থা বিশ্ববিদ্যালয়েই থাকিবে। বাহিরের অন্তঃসংক্রমণ হইতে তাহাদিগকে মুক্ত রাখা হইবে। তাহারা নিজেদের হাতে পাক করা মোটা ভাত খাইবে। নিজেদের হাতে বোনা মোটা কাপড় পরিবে। জীবনের যে কোন বিপর্যয়কে হাসি মুখে বরণ করিয়া লইতে তাহাদিগকে শুধু কঠোর পরিশ্রমই নয়, রীতিমতো কষ্ট সহ্য করিবার শিক্ষা দেওয়া হইবে।

ইসলামী বিশ্ববিদ্যালয়ের পরিকল্পনায় হাত দিয়া সবচেয়ে মুশকিলে পড়িয়াছি পরিচালক ও শিক্ষক খোঁজার ক্ষেত্রে। উপরোক্ত গুণে গুণান্বিত করিয়া ছাত্র-ছাত্রী গঠন করিতে হইলে প্রথমতঃ অধ্যাপকবৃন্দকেই তেমনটি হইতে হইবে। ইহা যে কেহ স্বীকার করিবেন। আর ইহাও স্বীকার করিবেন, এমন শিক্ষিত লোকের কত অভাব—শুধু বাংলাদেশে নয়, গোটা মুসলিম জাহানে। কোন কোন অমুসলিম দেশে তেমন ত্যাগী ও নিঃস্বার্থ অধ্যাপক मिलিবে। কিন্তু শুধু কর্মে মিলিলে তো চলিবেনা—চিন্তা-ভাবনায়ও মিলিতে হইবে। যাহোক আমি সকল প্রকার চেষ্টা চালাইয়া মোটামুটি রকম প্রথম দফা স্টাফ ইনশাল্লাহ বহাল করিবার

ইচ্ছা রাখি। অধ্যাপকবৃন্দও বিশ্ববিদ্যালয় অঙ্গনে থাকিবেন। তাহারা সাধারণ মানুষের মত হইলেও উচ্চ মানের সাধনাই করিয়া যাইবেন। এইবার আমার কাজ হইবে গোটা বিশ্ব খুঁজিয়া অন্ততঃ দশজন অধ্যাপক সহকারে বিশ্ববিদ্যালয়টি শুরু করিয়া দেওয়া। আর প্রথম বৎসরের জন্য গোটাদেশে খুঁজিয়া এহেন শিক্ষা লাভের ইচ্ছুক অন্ততঃ দুই শত জন ছাত্র-ছাত্রী যোগাড় করিয়া আনা। ক্রমে ক্রমে নিশ্চয়ই বিশ্ববিদ্যালয়টি ইহার পূর্ণ রূপ লাভ করিবে।

তবে প্রথম দিকে আমরা একটি বড় রকমের অসুবিধার সম্মুখীন হইব ছাত্র-ছাত্রীদের লইয়া। কারণ আন্তরিক ইচ্ছা থাকিলেও হঠাৎ করিয়া তাহারা এমন অভাবনীয় পরিবেশের সহিত খাপ নাও খাওয়াইতে পারে। তজ্জন্য আমাদের হতাশ হইয়া গেলে চলিবে না। মাত্র দু'তিন বৎসর কাটিলেই তাহা নিঃসন্দেহে দূর হইয়া যাইবে। আর দেশের গোটা শিক্ষা ব্যবস্থাই যতদিন পরিকল্পিত ইসলামী বিশ্ববিদ্যালয়ের মত না হইবে ততদিন আমাদের নিজেদের প্রচেষ্টায়ই প্রাথমিক, মাধ্যমিক ও উচ্চ মাধ্যমিক শিক্ষা প্রতিষ্ঠান স্থানে স্থানে প্রতিষ্ঠিত করিয়া সেখানকার ছাত্র-ছাত্রীদিগকে অন্ততঃ ইসলামী বিশ্ববিদ্যালয়ে স্বাভাবিক পড়াশুনার সুযোগ করিয়া দিতে হইবে। তাই বলিয়া আমরা এইভাবে শুধু নীরব সংগ্রামই করিয়া যাইব না, আন্দোলনের মাধ্যমে কর্তৃপক্ষকে ইসলামী শিক্ষা-ব্যবস্থামুখীও করিয়া তুলিব।

দুইটি উপলব্ধি

দেশে শিক্ষাবিদ ও চিন্তাবিদগণ যখন শিক্ষা ব্যবস্থা লইয়া চিন্তা-ভাবনা করিতেছেন তখন আমি কেনই-বা ইসলামী বিশ্ববিদ্যালয়ের পরিকল্পনা গ্রহণ করিলাম ইহা একটি প্রশ্ন বটে। স্পষ্ট ভাষায়ই আমি বলিতে চাই, ইহার কারণ আমার হতাশা ও উপলব্ধি দুই-ই। আমি বাংলাদেশের শিক্ষাবিদদের সম্পর্কে হতাশ হইয়াছি। তাহারা ঘুরাইয়া ফিরাইয়া এমন শিক্ষা-ব্যবস্থা কয়েম করিতে চান যেখানে ছাত্র-ছাত্রীরা অন্ধ হইয়া যাইবে—কাহাকেও মাথায় তুলিয়া নাচিবে, আবার কাহাকেও ঘৃণা ও অবজ্ঞাভরে তুচ্ছ জ্ঞান করিবে। সোজা কথায় ছাত্র-ছাত্রীরা শিক্ষাপ্রাপ্ত হইয়াও অজ্ঞ থাকিয়া যায়, মূর্খতার স্বভাব লাভ করিয়া যায়।

দ্বিতীয়তঃ আমি উপলব্ধি করিতে পারিয়াছি, গণচেতনা ও গণ আন্দোলনের সাথে সাথে আগামী দিনের জন্য ত্যাগী পুরুষ গড়িয়া তোলা দরকার। তাহারা শুধু ত্যাগীই নয়-সাধকও। তাহারাই চিন্তাবিদ, তাহারাই কর্মী; তাহারাই নেতা। এমন পুরুষই সমাজের জন্য কাম্য বটে। কিন্তু তাহার আবির্ভাবের জন্য প্রকৃতির দিকে চাহিয়া থাকিলে চলিবে না, এহেন পরিবেশও বজায় রাখিতে হইবে। বাংলাদেশের জন্য তেমন ত্যাগী চিন্তাবিদ আজ যে কত জরুরী তাহা প্রকাশ করিবার ভাষা আমার জানা নাই।

১৯৪৭ সালের পর আমরা যুব সমাজকে কিছুই দিতে পারি নাই। তাই আজ তাহাদের মধ্যে এত উচ্ছৃঙ্খলতা; এত দ্বিধা, এত দ্বন্দ্ব, তাহাদের মধ্যে শীঘ্রই এমন হতাশা ভাব জাঁকিয়া বসিবে যাহা দূর করিতে যথেষ্ট সময় লাগিবে। এই সময়ে জাতি অনেক দূর পিছাইয়া যাইবে। তাই কাল বিলম্ব না করিয়া কাজে ঝাঁপাইয়া পড়া দরকার। এখন বাংলাদেশের ৬২ হাজার গ্রাম কিছু পাইবার জন্য অপেক্ষা করিতেছে। শীঘ্রই তাহাদিগকে কিছু দিতে হইবে, আশার বাণী শুনাইতে হইবে। বাস্তব কর্মসূচী কিছু না কিছু দিতেই হইবে। তাহা না হইলে গোটা জাতি অজানা লক্ষ্যের পানে ছুটিয়া ধ্বংস ডাকিয়া আনিবে। তাই আমি ভাবিতেছি ইসলামী বিশ্ববিদ্যালয়ের ছাত্র-ছাত্রীদিগকে বাধ্যতামূলক ভাবে গ্রামে গ্রামে কাজ করিবার জন্য নিয়োজিত করিব।

আমি নিঃসন্দেহে আশাবাদী যে এমনি ভাবে কাজ করিয়া গেলে অচিরেই জাতিকে একটি বিশেষ লক্ষ্যের সন্ধান দেওয়া যাইবে। আর সন্ধান পাইলে অনুসন্ধিৎসু সমাজ অপ্রতিরোধ্য গতিতে আগাইয়া চলিবে। ইসলামী বিশ্ববিদ্যালয় সেই গতিপথ উন্মুক্ত করিয়া দিক, ইহাই আমার কামনা।

পাঁচটি বৈশিষ্ট্য

একটি কথা সত্য যে, 'ইসলামী বিশ্ববিদ্যালয়' বাংলাদেশে কেন সম্ভবতঃ পৃথিবীর যে কোন বিশ্ববিদ্যালয় হইতে পৃথক ধরণের হইবে। সংক্ষেপে বিশ্ববিদ্যালয়টির ৫টি বৈশিষ্ট্য তুলিয়া ধরিতেছিঃ

প্রথমতঃ ‘ইসলামী বিশ্ববিদ্যালয়ে’ অন্যান্য বিশ্ববিদ্যালয়ের ন্যায় কলা, বিজ্ঞান ও বাণিজ্য পড়ানো হইলেও প্রতিটি ছাত্র-ছাত্রীর জন্য যে কোন একটি কারিগরি শিক্ষা বাধ্যতামূলক থাকিবে। যেমন ধরুনঃ কোন ছাত্র ইতিহাসে এম, এ, পড়ে। তাকে রুটিন মাসিক বিশ্ববিদ্যালয়ে ইতিহাসের ক্লাস তো করিতেই হইবে তাছাড়া সে যদি কারিগরি শিক্ষাস্বরূপ তাঁতের কাজ বাছাই করিয়া লয় তবে তাকে প্রতিদিন রুটিন মাসিক তাঁতের কাজও শিখিতে হইবে। এইভাবে কাজটি শিখার সবচেয়ে বড় ফায়দা হইল, ইতিহাসে এম. এ পাশ করিয়া সে ডিগ্রীভিত্তিক কোন চাকুরী যদি নাও পায় তবু সে বেকার থাকিবে না। কারিগরি শিক্ষা যা-ই লইয়া থাকুক-তাঁতের কাজ হউক, সূতার মিস্ত্রীর কাজ হউক, ফিশারীর কাজ হউক, কৃষি কাজ হউক, ইলেকট্রিশিয়ানের কাজ হউক, কর্মজীবনে উহা তাহার উপকারে আসিবেই। এর মধ্যে আর একটি কথা বলিয়া রাখি। বিজ্ঞান, বাণিজ্য, বিশেষ করিয়া কলা বিভাগের সিলেবাস বাছাইয়ে অন্যান্য বিশ্ববিদ্যালয় হইতে আমাদের দৃষ্টিভঙ্গী আলাদা ধরনের হইবে। আমরা গণমুখী গবেষণা, দেশীয় প্রাকৃতিক বৈশিষ্ট্যভিত্তিক আবিষ্কার এবং আদর্শ ও ঐতিহ্যের আলোকে পাঠ্যসূচী প্রণয়ন-এই তিনটি বিষয়ের প্রতি সবিশেষ নজর দিব।

দ্বিতীয়তঃ প্রতিটি ছাত্র-ছাত্রীর জন্য নির্দিষ্ট মাত্রার দৈহিক প্রশিক্ষণ বাধ্যতামূলক থাকিবে। দৈহিক প্রশিক্ষণ ইউনিটই খেলাধুলা ও কায়িক পরিশ্রমের রুটিন এবং শারীরিক-মানসিক স্বাস্থ্য রক্ষার উপায়াদি নিয়ন্ত্রণ করিবে। বিশ্ববিদ্যালয় চত্বরে ছাত্র-শিক্ষকগণ আমোদ-প্রমোদের সুযোগ সুবিধা লাভ করিবেন। উহার মাধ্যমগুলি উক্ত ইউনিটের তত্ত্বাবধানে থাকিবে। এইভাবে ছাত্র-ছাত্রীদের যাবতীয় আচরণবিধি ঐ ইউনিটের দেখাশুনার বিষয় হইবে। তবে ইহাও ঠিক যে, নিয়ন্ত্রণ-সীমা কখনো কোন ক্ষেত্রেই স্বভাব-বিরুদ্ধ হইবে না। গবেষণা ও তথ্য ইউনিটের পরামর্শ মোতাবেক আলাদা ভাবে প্রতিটি ছাত্র-ছাত্রীর স্বভাব ও গঠন নির্দিষ্ট করিয়া রুটিন করা হইবে। উহাতে পরিবেশ ও কাজকর্ম অত্যন্ত নতুন হইলেও কোন ছাত্র তাহাতে খাপ খাওয়াইয়া নিতে মোটেই বেগ পাইবে না। তবে একটি ক্ষেত্রে ইউনিটগুলি আপোষহীন হইবে। তাহা হইল, সবাইকে কঠোর পরিশ্রম করিতে হইবে। পোষাকে ও

চালচলনে অতিশয় অনাড়ম্বর হইতে হইবে। খাওয়া-দাওয়া পুষ্টিকর হইলেও অত্যন্ত মামুলি ধরণের এবং দেশীয় হইবে।

তৃতীয়তঃ প্রতিটি ছাত্র-ছাত্রীকে তাহার ধর্মের মূলশিক্ষা বিজ্ঞানসম্মত উপায়ে দান করা হইবে এবং তাহা আমল করা বাধ্যতামূলক থাকিবে। উদাহরণ স্বরূপ, মুসলমান ছাত্র-শিক্ষকদের মধ্য হইতে মসজিদের ইমাম ও মুয়াজ্জিন মনোনয়ন করা হইবে। এক সপ্তাহ কাল পর পর নতুন করিয়া মনোনয়ন হইবে। ইমামকে জুমআর খুৎবায় চলতি সপ্তাহের বিশ্ব-সমীক্ষা আলোচনা করিতে হইবে। এইভাবে হিন্দু হউক, মুসলমান হউক, খ্রীষ্টান হউক, বৌদ্ধ হউক, প্রত্যেক ছাত্রকে স্বীয় ধর্মের ধারায় শৃঙ্খলা, পবিত্রতা, চরিত্র গঠন এবং বিশ্বানুভূতির শিক্ষা দান করা হইবে। পবিত্র জীবন যাপন ও চরিত্রবান হওয়ার প্রতি অবহেলা করিলে কোন ছাত্রকেই ক্ষমা করা হইবে না। গবেষণা ও তথ্য ইউনিটের দায়িত্বে এইসব তদারক করা হইবে।

চতুর্থতঃ কেরোসিন তৈল ও লবণ ছাড়া বাকি সবকিছুই বিশ্ববিদ্যালয় চত্বরে ছাত্রদিগকে উৎপাদন করিয়া লইতে হইবে। এই উৎপাদনের দায়িত্ব গ্রুপে গ্রুপে ভাগ করা থাকিবে। আবার বিনিময় প্রথা অনুসারে একে অন্যেরটি ভোগ করিবে। এইভাবে প্রতিটি ছাত্রের যাবতীয় চাহিদা, যথা—কাপড়, সবজি, মাছ, মশলা ইত্যাদি ছাত্ররাই ছাত্রদিগকে সরবরাহ করিবে। একটি উদাহরণঃ ধরুন দর্শন বিভাগের ছাত্ররা তাঁতের কাজ অর্থাৎ কাপড় বুননকে কারিগরি শিক্ষা স্বরূপ পছন্দ করিয়া লইয়াছে। আবার রসায়ন বিভাগের ছাত্ররা লইয়াছে চামড়ার কাজকে। কারিগরি ইউনিটের মাধ্যমে তাহাদের মধ্যে চাহিদা মিটানোর ব্যবস্থা হইবে। যেমন লুঙ্গি, গামছা, পাঞ্জাবী ও পায়জামার কাপড়ের বিনিময়ে জুতা, ব্যাগ ইত্যাদি সরবরাহ করা হইবে। চাহিদার সংখ্যাতত্ত্ব, আদান প্রদানের বাটোয়ারা ইত্যাদি সবকিছুই কারিগরি ইউনিট নিয়ন্ত্রণ করিবে।

পঞ্চমতঃ প্রতিটি ছাত্র-ছাত্রীকে শিক্ষা বৎসরগুলির মধ্যে চার পাঁচ সপ্তাহ কাল প্রত্যন্ত গ্রামে কিংবা শিল্প এলাকায় হাতে কলমে কাজ করিতে হইবে। যেমন ধরুনঃ ইংরেজী বিভাগের ছাত্রগণ প্রথম বৎসরে

কিংবা দ্বিতীয় বর্ষের আগস্ট মাসে পাট কাটার মওসুমে দেশের কোথাও মাঠে কাজ করিবে। কিংবা ধরুন, বাণিজ্য বিভাগের ছাত্রগণ ফেব্রুয়ারী মাসে দেশের কোন সুগার মিলে আখ টুকরা করার কাজে যোগদান করিবে। এইজন্য দেখা যাইবে যে, অবসরের দিন কাটানোর জন্য ছাত্র-শিক্ষকদের কোন ছুটিই দেওয়া হইবে না। সাংস্কৃতিক, রাষ্ট্রীয় ও ধর্মীয় কয়েকটি বড় উৎসবে ছুটি দেওয়া হইবে বটে কিন্তু উহার মধ্য দিয়াও শিক্ষামূলক কাজ আদায় করিয়া লওয়া হইবে। যাহোক মূল কথা হইল, ছাত্র-ছাত্রীর মধ্যে যাহাতে বৈপ্লবিক দৃষ্টিভঙ্গী লইয়া শ্রমের প্রতি মর্যাদাবোধ দেখা দেয় তাহার পরিবেশ সর্বতোভাবে বজায় রাখা হইবে। মানুষের কল্যাণকেই সবচেয়ে বড় বলিয়া জানিবার স্পৃহা জাগানো হইবে।

আমি স্বীকার করিতেছি, প্রথম হইতেই এই পাঁচটি বৈপ্লবিক বৈশিষ্ট্যে মণ্ডিত করিয়া ‘ইসলামিক ইউনিভার্সিটি’ চালু করা সম্ভব হইবে না। প্রথম হইতেই পরিকল্পনাগুলি কার্যকরী করার কাজে হাত দিলেও কয়েকটি সেশন কাটিয়া গেলে উহার পুরাপুরি রূপটি দেখা যাইবে। আর ইহাও তো মানিয়া লইতে হইবে যে, পরীক্ষা-নিরীক্ষায় পরিয়া সবকিছুতে কমবেশী রদবদলের প্রয়োজনীয়তাও দেখা দিতে পারে। কিন্তু সম্পূর্ণ নতুন হইলেও এইভাবে একটি বিশ্ববিদ্যালয় প্রতিষ্ঠিত থাকা মোটেই অসম্ভব নয়, ইহা আমি বিশ্বাস করি।